




ЎЗБЕКИСТОН ПРЕЗИДЕНТИ ЭРОН ТАШҚИ ИШЛАР ВАЗИРИНИ ҚАБУЛ ҚИЛДИ



Ўзбекистон Республикаси Президенти Шавкат Мирзиёев 5 апрель кунни мамлакатимизга амалий ташриф билан келган Эрон Ислон Республикаси ташқи ишлар вазири Муҳаммад Жавад Зарифни қабул қилди.

Учрашувда Ўзбекистон билан Эрон ўртасидаги сиёсий, савдо-иқтисодий, инвестициявий, транспорт-логистика ва бошқа соҳалардаги ҳамкорликнинг бугунги аҳволи ва уларни ривожлантириш истиқболлари муҳокама қилинди.

Давлатимиз раҳбари коронавирус пандемияси келтириб чиқарган мураккаб шароитларга қарамай, Ўзбекистон — Эрон муносабатлари изчил ривожланиб бораётганини мамнуният билан қайд этди.

Вазир Муҳаммад Жавад Зариф, ўз навбатида, самимий қабул учун давлатимиз раҳбарига миннатдорлик билдириб, Эрон Президенти Ҳасан

Рухонийнинг саломи ва эзгу тилақларини етказди. Учрашувда иқтисодий ҳамкорлик масалаларига, савдо алоқаларини ривожлантириш ва янги кооперация лойиҳаларини илгари суришга алоҳида эътибор қаратилди.

Транспорт-коммуникация соҳасидаги ҳамкорликни кенгайтириш, хусусан, Эроннинг денгиз портларидан самарали фойдаланиш ҳамда Ўзбекистон-Туркменистон-Эрон-Ўмон транспорт йўлагини ривожлантириш муҳим экани таъкидланди.

Шунингдек, халқаро ва минтақавий сиёсатнинг томонларни қизиқтирган долзарб жиҳатлари, жумладан, минтақавий хавфсизликни таъминлаш ва

Афғонистонда тинчлик жараёнини илгари суриш масалалари муҳокама қилинди.

Эрон ташқи сиёсий идораси раҳбари Ўзбекистоннинг Афғонистон бўйича тинчлик музокараларига кўмаклашиш, ушбу мамлакатни минтақавий савдо-иқтисодий ҳамкорликка жалб этиш борасидаги саъй-ҳаракатларини юқори баҳолади.

ЎЗА

Ўзбекистон Республикаси Президенти Матбуот хизмати суратлари.

ЎЗБЕКИСТОН RESPUBLIKASI PREZIDENTI Rossiya DELEGATSIYASINI QABUL QILDI



Ўзбекистон Республикаси Президенти Шавкат Мирзиёев 5 апрель кунни халқаро "Иннопром" саноат кўргазмасида иштирок этиш учун Тошкент шаҳрида бўлиб турган Россия Федерацияси саноат ва савдо вазири Денис Мантуров бошчилигидаги делегацияни қабул қилди.

Таъкидлаш жоизки, "Иннопром" Россия Федерацияси Хукумати томонидан иқтисодиётнинг турли тармоқларида илғор технологиялар ва замонавий ишланмаларни биргаликда илгари суриш мақсадида ўтказиб келинаётган энг йирик кўргазма ҳисобланади. Ушбу тадбир мамлакатимизда биринчи марта ўтказилмоқда.

Учрашувда Ўзбекистон ва Россия ўртасидаги кенг қўламли амалий ҳамкорликни янада кенгайтириш, стратегик шериклик муносабатларини мустақамлашнинг долзарб масалалари муҳокама қилинди.

Денис Мантуров давлатимиз раҳбарига икки мамлакатнинг етакчи саноат компаниялари ва банк-молия институтлари

иштирокида йирик кооперация лойиҳаларини амалга ошириш бўйича биргаликда амалга оширилаётган ишларнинг натижалари тўғрисида маълумот берди.

Сўхбат чоғида бизнес ва ҳудудлар даражасидаги кўп қиррали шерикликни мустақамлаш, иқтисодиётнинг турли тармоқларидаги ҳамкорликни кенгайтириш ва янги лойиҳаларни амалга оширишга алоҳида эътибор қаратилди.

Пойтахтимизда "Иннопром" кўргазмасининг муваффақиятли ўтказилиши ушбу вазифаларни бажаришга хизмат қилиши таъкидланди.

ЎЗА

БУНЁДКОРЛИК

ОРОЛҚУМ ОРОЛЎРМОНГА АЙЛАНМОҚДА

— Орол денгизи қадим денгизлардан ҳисобланиб, катталиги бўйича дунёда тўртинчи ўринда турган ва бой табиий захиралари билан машҳур бўлган. Орол бўйи ҳудуди эса биологик бой табиий муҳит ҳисобланган. Бу ерда ўсимлик ва ҳайвонот оламининг биологик хилма-хиллигини сақлаш ҳозирги куннинг долзарб масалаларидан бири. Табиий биотоплардаги ўзлаштириш жараёнларининг кучайиши, флора ва фаунага антропоген таъсир Орол бўйи минтақаси учун табиий ресурсларининг ҳозирги ҳолатини аниқлашда долзарб муаммо ҳисобланади.

3-бетга қаранг

ХАЛҚАРО СТАНДАРТЛАРГА МОС МЕЗОНЛАР

ЖОРИЙ ЙИЛДА 8150 ТА ЯНГИ СТАНДАРТ ҚАБУЛ ҚИЛИНИБ, БОЗОР ИҚТИСОДИЁТИ МЕХАНИЗМЛАРИГА САЛБИЙ ТАЪСИР КЎРСАТАДИГАН ВА МАЪНАН ЭСКИРГАН 2013 ТА МЕЗОН АМАЛИЁТДАН ЧИҚАРИЛАДИ

Маҳсулотлар сифати ва рақобатдошлигини ошириш учун миллий стандартларни жаҳон талабларига мослаштириш ҳамда корхоналарга жорий қилиш жуда муҳим ҳисобланади. 2020 йилнинг ўзида халқаро талаблар билан уйғунлашган 6 минг 79 та стандарт қабул қилиниб, 3 минг 837 таси қайта кўриб чиқилди. Натижада бундай стандартлар сони 14 минг 858 тага етказилди. Ўз навбатида, тадбиркорларга қулайлик яратиш мақсадида бозор иқтисодиёти механизмларига салбий таъсир кўрсатадиган ва маънан эскирган 6 минг 81 та стандарт амалиётдан чиқарилди ва 3 минг 837 таси қайта кўриб чиқилди.

Чунки, замонавий иқтисодий тараққиётда истеъмолчиларга тақдим этилаётган маҳсулотларнинг сифатини кафолатлаш талаби кескин ортиб бормоқда. Улар билан узвий боғлиқ бўлган маҳсулотлар ва ишлаб чиқариш жараёнлари хавфсизлиги масалалари ҳам долзарб аҳамият касб этяпти. Бинобарин, ички бозорни сифати ва

хавфсизлиги техник жиҳатдан тартибга солиш соҳасидаги меъёрий ҳужжат талабларига жавоб бермайдиган маҳсулотлардан ҳимоя қилиш ҳар қандай давлатнинг асосий вазифаларидан бири ҳисобланади.

Давоми 2-бетда

"ИННОПРОМ": ЯНГИ МАҲСУЛОТЛАР МАЙДОНИ, КРЕАТИВ ҒОЯЛАР САРИ ЙЎЛ



Кеча, 5 апрель кунни Тошкентдаги "Ўзэкспомарказ" миллий кўргазмалар мажмуасида Ўзбекистон Республикаси Инвестициялар ва ташқи савдо вазирлиги ҳамда Россия Федерацияси Саноат ва савдо вазирлиги ҳамкорлигида халқаро "Иннопром" саноат кўргазмаси иш бошлади. Мазкур кўргазма 2010 йилдан буён Россиянинг Екатеринбург шаҳрида ўтказиб келинади. Бу йил мамлакатимизда илк бор ташкил этилган, "Ўзбекистонда катта саноат ҳафталиги", дея расмий таърифланган халқаро тадбирда Ўзбекистон, Россия, Франция, Германия, Япония, Чехия, Озарбайжон, Арманистон, Беларусь, Қозоғистон, Қирғизистон каби давлатлардан ҳукуматлар делегациялари, хусусан, 300 дан зиёд йирик саноат компаниялари, ишбилармон доиралар вакиллари қатнашмоқда, 1 минг 100 дан ортиқ корхоналар ўз маҳсулотларини намойиш этмоқда.

Давоми 2-бетда

